



Äntwert vun der Madamm Gesondheetsministesch op d'parlamentaresch Fro n° 7209 vum 17. November 2022 vum honorabelen Deputéierten Här Claude Wiseler an vun der honorabeler Deputéiert Madamm Martine Hansen.

Et ass richteg, dass den "Strategic Advisory Group of Experts on Immunization", kuerz SAGE, vun der Weltgesundheitsorganisatioun (WHO) sech vum 4. bis den 7. Abrëll 2022 gesinn huet, fir ënner anerem iwwert d'Impfung géint den "Human Papillomavirus" (HPV) ze beroden.

Aus dem Rapport vun dëser Réunioun, deen och am « Relevé épidémiologique hebdomadaire » vum 17. Juni 2022 (Numero 24, Säiten 261-276) vun der WHO publizéiert gouf, geet kloer ervir, dass d'Experten sech besuergt weisen iwwert de luesen Fortschritt vun den HPV-Impfprogrammer a ville Länner, dem déiwee Impftaux, dem héijen Abandon zwëschen den eenzelnen Dosen an dem negativen Impakt vun der Covid Pandemie. Esou gëtt geschätzt dass weltwäit ongeféier een Drëttel vun de jonken Meedercher eng éischt Dosis vu Vaccin kruten an nëmme 13% eng zweet Dosis. De SAGE huet nach emol insistéiert, dass dréngend a prioritär Impfprogrammer fir Meedercher zwëschent 9 an 14 Joer gemaach solle ginn, mat enger Méiglechkeet eng "vaccination de rattrapage" ze maachen bis 18 Joer. De SAGE schreift weider fir aner Populationsgruppen : *"Le SAGE a demandé à l'OMS d'élaborer un cadre pour l'établissement des priorités afin d'aider les pays à identifier les groupes cibles secondaires pour la vaccination, tels que les garçons, les hommes et les femmes plus âgées et les personnes infectées par le VIH, en fonction de la charge de la maladie, de l'accessibilité financière, du rapport coût-efficacité, des effets de l'immunité collective et de la faisabilité du Programme. La vaccination des groupes cibles secondaires doit être gérée avec soin tant que l'approvisionnement en vaccin est limité"*.

De SAGE verschléisst sech also net enger Impfung fir Leit ausserhalb dem Jugendalter, mécht awer keng formell Recommandatioun a weist op eng Rei potenziell Problemer hin, ënner anerem op den relativen Manktem u Vaccin, mam Risiko dass d'Impfung vun der primärer Zilgrupp (Meedercher zwëschent 9 bis 14 Joer) nët méi garantéiert ass wann zevill Leit aus sekundären Gruppen geimpft ginn.

Zu Lëtzebuerg ginn effektiv Meedercher a Jongen tëschent 9 a 15 Joer säit 2018 geimpft an d'Käschten vun der Impfung gi vum Staat iwwerholl. D'Inzidenz vum Gebärmutterhals-Kriibs leit aktuell bei ongeféier 7,5 Fäll pro 100.000 Persounen, an stëllt domat eng Baisse duer par rapport zu den 1980-er Joeren wou den Taux un Fäll bei 15-20 pro 100.000 Persounen lung. D'Gesondheitsdirektioun huet keng rezent Donnéeën iwwert den Impftaux, fir d'Joeren 2021 an 2022 goufen awer pro Joer eng ronn 13.000 Dosen administréiert (fir eng ronn 7.000 Jugendlecher, Impfschema mat zwou Dosen). Méi genau Informatiounen wäerten disponibel sinn soubal den Carnet de vaccination électronique flächendeckend agefouert ass. Aktuell ass dësen an enger Pilotphase.

Am Joer 2015, also iert d'Jongen och geimpft konnten ginn, louch den Impftaux bei de Meedercher fir eng Dosis bei 66,2%, fir zwou Dosen bei 61,1% and fir dräi Dosen bei 52,9% (deemools war den Impfschema nach mat dräi Dosen, haut ginn der nëmme méi zwou benotzt). Och wann dës Taux'en am internationalen Vergläich net schlecht sinn, a méi rezent eventuell méi héich leien, sinn se nach net ganz zefriddestellend an et ass virgesinn an den nächsten Méint eng weider Sensibiliséierungscampagne ze maachen.



LE GOUVERNEMENT
DU GRAND-DUCHÉ DE LUXEMBOURG
Ministère de la Santé

Leit iwwert 15 Joer kënnen sech op fräiwëlleger Basis impfen loossen, d'Käschten ginn aktuell an deem Fall allerdéngs net vun Staat iwverholl. Et handelt sech heibäi em een deieren Impfstoff deem seng Wierksamkeet am Beschten ass, wann e benotzt gëtt iert d'Persoun fir d'éischt mam HPV a Kontakt kënnt, d.h. virum éischten Geschlechtsverkéier. Dobai kënnt dat bei Leit iwwert 15 Joer d'Impfung manner wierksam ass an dräi Impfdosen néideg sinn. Dofir insistéiert d'Gesondheetsdirektioun dorop dass d'Jugendlecher sech esou fréi wéi méiglech impfe loossen.

Lëtzebuerg, den 19. Dezember 2022

D'Gesondheetsministesch
(s.) Paulette Lenert